



**A** Delbertus multis uirtutibus exornatus fuit. Itaq; Hamburgensis ecclesiæ præsul omnium consensu electus est, anno Christi 1040. Postea in omnibus borealibus regnis, Daniæ, Suetiæ, & Noruagiæ legatus apostolicus cõstitutus, & tandem in patriarchalem dignitatem subleuatus fuit. Confluebant tum in curiam eius multi sacerdotes & episcopi qui sedibus suis à uicinis Barbaris expulsi erant. Hos benigno animo suscepit & liberaliter fouit. Eos postea ad diuersas gentes emisit, & Christianorum religionem docere iussit. Is etiam Aldenburgensem ecclesiam in tres episcopatus sua authoritate diuisit, utpote in Aldenburgicum, Megalopolitanum, & Raciburgicum.

In his locis uiros doctos præsules constituit, & eos suo exemplo formam gregis esse iussit. Sic factum ut Adelbertus ob res præclare administratas, suo tempore in maxima existimatione fuerit. Alb. Crauz. in Vandal. lib. 3. cap. 3.